

Thursday, September 11, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)



CM

Chief Minister Pu Lalduhoma'n kuthnathawka eizawng an tam avangin loneituten tui tha an mamawh a ti a, ram tana rotling hmachhawp neih a pawimawh thu a sawi.

Vawiin khan Chief Minister leh Irrigation & Water Resources Minister Pu PC Vanlalruata leh Department hotuten Irrigation & Water Resources Department hmalakna hrang hrang an sawiho a, Pu Lalduhoma chuan project tha neiha ram tana rotling siam turin theihtawpa tan lak a pawimawh thu a sawi a, Mizoramah leilet hmun hrang hranga tui lakna awlsam a awm theih nan theihtawp chhuah a tul thu a sawi bawk.

Vawiina thutkhawmah hian Mizorama National Hydrology Project leh State Water Informatics Centre kal zel dan tur sawi niin Serlui B HEP tui hman hnu tam tham tak luangral thin hi a thlang lama thlai chingtute tana hman tangkai dan tur zirchian tha an tih thu an sawi a, Leilet leh Phai thlai tharchhuahna hmunah science thiamna sang zawk hmanga tuisem kual chu ram pumah kalpui tum mek anih thu an sawi a, Mizorama a thawh khatna turin Champhai leh Mat phai command area atan project thehluh phawt a ni.



BJP PRESS CONFERENCE

BJP Mizoram State President Dr K Beichhua chuan tun thla ni 13-a Prime Minister Narendra Modi-a'n Bairabi atanga Sairang rel kawng a hawn tur chuan Aizawl chu Railway Map ah a awm tir ve tawh dawn a, hmasawna tam tak a thlen dawn a ni a ti.

He thu hi vawiina BJP Mizoram State Office Upper Republic Mipui Run-a Prime Minister in Mizoram Railway a hawna tur chungchanga thuthar thehdarhtute a kawmnaah sawiin, Dr K Beichhua chuan Bairabi atanga Sairang rel kawng hawng turah India ram kilkhawra awm Mizorama Prime Minister Narendra Modi-a a lo kal tur chu lawmawm an tih thu sawiin, tun atang chuan Aizawl chu Railway Map ah a awm ve tawh dawn tih sawiin, hei hian hmasawna tam tak a thlen dawn a ti

a, he hmalakna hi hmasawna huapzo tak ni a an hriat thu sawiin, Mizoram chu hmalam hun eng tak a siamsak nia an hriat thu a sawi.



JCM PROTEST

Joint Civil Society of Mizoram (JCM) huaihawtin vawiin khan Vanapa Hall kawtah Assembly Session neih zawh taka Forest Conservation Amendment Act 2023 pass tak duh lohna leh dodalna hun hman a ni.

He hun kaihruaitu JCM Convener Dr Lalbiakmawia Ngente chuan Mizoram Assembly Session in FCAA 2023 a pawm tak avangin Mizoram in ven theihna awmchhun pakhat, Article 371 G chu hman theih a ni tawh lo a, sorkar laipui hmalakna chu state sorkar leh Mizo mipuite chuan sawi theihna leh lo dan theihna dan an nei tawh lo tih sawiin, environment leh ramngaw humhalh tura vantlang mipui rawna te pawh a awm thei tawh dawn lo tih a sawi a ni.

He hunah hian Mizoram First aiawha Pu ZR Thanghmingliana, Centre for Environment & Social Justice aiahaw thusawi Tv Joseph Hmingropuia leh Mizoram Transformation Movement aiawha thusawi Dr Vanlalsiama Chhangte te pawhin Mizoram Assembly Session in FCAA 2023 a adopt an duh loh zia leh Mizoram dinhmun a tihderthawn zia te sawiin, Mizo thalaite chu ram leh hnam tana au chhuak turin an chah a ni.

JCM huaihawt FCAA 2023 duh loh lantirna hi NGO leh Political Party hrang hrangten an thlawp angin he hunah hian Party hrang hrang hruaitute pawhin thu an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zandin dar 6 leh a chanve-ah Chanchinthar puan leh a ni ang.



GST REFORMS

Prime Minister Narendra Modi a’n chhiah chawi dan thar a tihchhuah chu september ni 3 khan GST council chuan a pawm a, kawng hrang hrang in chhiah chawi tur tih hniam a ni a, mipui vantlang nawlpui te nun awlsam zawk na tur leh mi harsa zawk te tan a duan ani a, abik in electronics thil siam te chu man man zawk a lei theih in a awm phah dawn a ni.

(NewsonAIR)



NEPAL

Nepal a Gen Z ten nawrh an huaihawt a thi zat chu mi 30 an tling tawh tih Nepal Ministry of Health and population chuan a tarlang a, mi 1000 chuang hliam tuar an awm mek a ni.

Health Ministry chuan thil awm dan ngaihvenin an inral ring reng a ti a, damdawiin te pawh hliam tuar te buaipui tura an hriattir thu a sawi. September ni 8 khan KP Sharma Oli kaihhruai sawrkar in social media khapna a tih chhuah duhloh lantir in Kathmandu ah thalai ten nawrh an huaihawt a, he khapna hi hlih a, langtlang zawka sawrkar kal an phut vang a nih thu an tarlang a ni.

(NewsonAIR)



BIHAR

Bihar Chief Secretary Pratyaya Amrit chuan Nepal ram dinhmun thlir in official te nen Patna-a secretariat ah an thukhawm.

Nepal rama tharum thawhna thleng mek avang in Chief Secretary chuan India leh Nepal ramri bul a District te venhimna khauh zawk ngaihtuah tur in a hriattir a, state chhunga zirna in zawng zawngte bak ah rel station leh power plant te venhimna khauh zawk a kalpui turin a hriattir bawk.

(NewsonAIR)

